



ADRESA: Alipašina 14/L, 71 000 Sarajevo
Vakufska banka DD Sarajevo: 1602000023176039; ID BROJ: 4201099390000
TEL/FAX: (+387) 033/206-736; (+387) 061/348-082 - E-mail: karatefederacijebih@gmail.com

DISCIPLINSKI PRAVILNIK

KARATE SAVEZA FEDERACIJE BOSNE I HERCEGOVINE



Sarajevo: Juli 2018. godine

U skladu sa članom 20. stav (1) tačke 11) Statuta Karate saveza Federacije Bosne i Hercegovine od 13.07.2018. godine Upravni odbor Karate saveza Federacije Bosne i Hercegovine na svojoj 5. redovnoj sjednici održanoj u Sarajevu dana 13.07.2018. godine je usvojio:

DISCIPLINSKI PRAVILNIK KARATE SAVEZA FEDERACIJE BOSNE I HERCEGOVINE

I - OPŠTE ODREDBE

Član 1.

Disciplinskim pravilnikom Karate saveza Federacije Bosne i Hercegovine (u daljem tekstu: KS FBIH) reguliše se:

- a) Postupak u kojem se odlučuje o odgovornosti takmičara, sudija, trenera, rukovodilaca i klubova u karate sportu (u daljem tekstu: karate subjekti) koji protivpravnim ponašanjem povrede materijalno-pravne propise KS FBIH i to Statut, pravilnike i druge normativne akte ili na bilo koji drugi način štete ugledu karate sporta;
- b) Utvrđuje vrsta i visina kazne za disciplinske prekršaje koji budu počinjeni povredama iz tačke 1. ovog člana.

Član 2.

Nepoznavanje Statuta i pravilnika u članu 1. ovog pravilnika ne oslobađa od odgovornosti.

Član 3.

Ko drugog podstrekne da izvrši disciplinski prekršaj ili ko drugom pomogne u izvršenju prekršaja odgovoran je kao neposredni učinilac prekršaja i kazniće se istom kaznom kao i neposredni učinilac prekršaja.

Član 4.

Pokušaj disciplinskog prekršaja je kažnjiv, a učinilac disciplinskog prekršaja u pokušaju kazniće se kaznom primjerenom okolnostima pod kojim je pokušaj prekršaja preduzet.

Član 5.

U slučaju sticaja disciplinskih prekršaja (ako je jednom radnjom izvršeno više povreda pravila), za svaki učinjeni prekršaj će se prvo utvrditi pojedinačna kazna i istovremeno odlučiti o jednoj jedinstvenoj kazni, koja ne može biti veća od zbira kazni za svaki učinjeni prekršaj.

Član 6.

Svrha kažnjavanja po odredbama ovog Pravilnika je preventivno dejstvo kazne koje se sastoji u:

- a) Generalnoj prevenciji - uticaju da se vaspitno edukativnim djelovanjem spriječi vršenje prekršaja u karate sportu;
- b) Specijalnoj prevenciji - uticaju na učinioca prekršaja kako ne bi vršio prekršaje u budućnosti.

Svrha kažnjavanja po ovom Pravilniku ima i represivni karakter koji se sastoji u primjeni prinude na učinioca prekršaja kako bi se ostvarila prevencija iz tačke 1. i tačke 2. ovog člana.

Član 7.

U slučaju recidiva - ukoliko učinilac za vrijeme izdržavanja kazne ili nakon izdržane kazne izvrši novi prekršaj, izreći će se prvo kazna za novi prekršaj, a zatim jedinstvena kazna prema odredbama člana 5. ovog Pravilnika.

Član 8.

Kod utvrđivanja kazne uzimaju se u obzir sve okolnosti koje utiču da kazna bude blaža ili teža (olakšavajuće i otežavajuće okolnosti), a naročito težina izvršenog prekršaja i njegove posljedice, stepen odgovornosti izvršioca, pobude zbog kojih je izvršen prekršaj, okolnosti pod kojim je izvršen prekršaj, ranije ponašanje izvršioca i njegovo držanje poslije izvršenog prekršaja.

Prekršaj izvršen na međunarodnom takmičenju u zemlji ili inostranstvu uvijek je otežavajuća okolnost.

Samo izuzetne olakšavajuće okolnosti mogu bitno uticati na ublažavanje kazne u granicama propisane ovim Pravilnikom.

Član 9.

Postupak za utvrđivanje prekršajne odgovornosti vodi se pred Disciplinskom komisijom.

Postupak za utvrđivanje prekršajne odgovornosti počinje zakazivanjem rasprave na koju se poziva učinilac prekršaja, podnosilac prekršajne prijave i po potrebi druga lica.

Zastarjelost gonjenja učinioca prekršaja nastupa nakon proteka roka najdužeg trajanja vremenske kazne, a ukoliko za prekršaj nije predviđena vremenska kazna u roku od 90 dana od dana izvršenja prekršaja.

Prekršajna prijava protiv učinioca prekršaja mora se podnijeti u roku od 30 dana od dana saznanja za učinjeni prekršaj, a najduže u roku od 60 dana od dana učinjenog prekršaja. Nakon isteka ovog roka prijava protiv učinioca prekršaja biće odbačena kao nedozvoljena.

Ukoliko je prekršaj učinjen na međunarodnom takmičenju zastarjelost gonjenja iz predhodnog stava ovog člana nastupa nakon proteka 6 mjeseci od dana izvršenja prekršaja.

Sve dok se postupak može pokrenuti protiv takmičara ili rukovodioca, može se pokrenuti i postupak protiv kluba.

Zastarjelost gonjenja učinioca prekršaja prekida se svakom radnjom koja se preduzima u postupku po odredbama ovog Pravilnika.

Član 10.

Niko ne može biti kažnjen, prije nego što mu u postupku bude omogućeno da iznese odbranu.

Pravo na odbranu u prekršajnom postupku učinilac prekršaja može ostvariti ćutanjem, usmenim iznošenjem odbrane neposredno u postupku i dostavljanjem pismene odbrane.

Pismenu odbranu učinilac prekršaja dužan je dostaviti Disciplinskoj komisiji najkasnije u roku od 7 dana prije zakazane rasprave o odgovornosti za učinjeni prekršaj.

Ako izvršilac prekršaja odbije da dođe na saslušanje, a ne dostavi pismenu odbranu, o njegovoj odgovornosti će se odlučiti na osnovu dokaza prikupljenih u fazi ispitivanja prekršajne prijave.

Član 11.

Pod ovaj Pravilnik ne potpadaju prekršaji koji se sprovode na licu mjesta.

Isključenje iz daljeg takmičenja (SHIKAKU) povlači za sobom automatsku suspenziju u vremenskom periodu od 60 dana, novčanu kaznu u iznosu od 500,00 KM i disciplinski postupak.

Član 12.

Ako se u roku od 30 dana ne povede disciplinski postupak prestaje automatska suspenzija.

Kada Disciplinska komisija povede disciplinski postupak, može se i ranije ukinuti automatska suspenzija i povesti redovni disciplinski postupak.

Za najteže disciplinske prekršaje automatska suspenzija se ne može ukinuti prije isteka 60 dana od dana učinjenog prekršaja ili od dana saznanja za prekršaj.

Član 13.

Automatsku suspenziju na takmičenju izriče delegat takmičenja.

II - DISCIPLINSKI ORGANI I NADLEŽNOSTI

Član 14.

Disciplinski organi Saveza su:

- a) Prvostepeni organ za sve prekršaje je Disciplinska komisija Saveza
- b) Drugostepeni organ za sve prekršaje je Upravni odbor Saveza.

Član 15.

Disciplinska komisija se sastoji od 3 člana, koje imenuje u skladu sa Statutom Upravni odbor Saveza.

Predsjednik Disciplinske komisije ili najmanje jedan član mora biti pravnik.

Za punovažno donošenje odluka na sjednici disciplinskih tijela mora biti prisutna većina članova, a odluke se donose na sjednici većinom glasova.

Član 16.

Žalbe na odluke prvostepenog organa podnose se drugostepenom organu.

U vršenju svoje funkcije Disciplinska komisija je nezavisna i odluke donosi na osnovu ovog Pravilnika i drugih opštih akata KS FBiH, a za svoj rad odgovorna je organu koji ju je imenovao.

Član 17.

Žalba na odluku prvostepenog organa može se podnijeti u roku od 8 dana.

Odluka Upravnog odbora Saveza je konačna.

III - DISCIPLINSKI PREKRŠAJI

Član 18.

Lakšim disciplinskim prekršajima smatraju se nesportska ponašanja i nepridržavanje akata KS FBiH, koji ne izazivaju veću štetu, niti imaju veću društveno-sportsku opasnost i to:

Za pojedince:

- a) Neblagovremeno dostavljanje podataka ili dokumentacije KS FBiH;
- b) Nepristojno ponašanje prije takmičenja, tokom takmičenja i poslije takmičenja u prostorijama gdje se održava takmičenje, kojim se narušava lik sportiste i povrijeđuju propisana pravila takmičenja;
- c) Nepristojno oblačenje kojim se povrijeđuju propisana pravila takmičenja;
- d) Svako drugo činjenje ili nečinjenje koje na bilo koji način narušavaju propisana pravila takmičenja.

Za klubove:

- a) Neuredne ili neblagovremene prijave klubova u ekipnim i takmičara u pojedinačnim takmičenjima;
- b) Kašnjenja dolazaka ekipa na takmičenja;
- c) Slaba organizacija takmičenja i slično za koju odgovornost snosi klub kao tehnički organizator;
- d) Svako drugo činjenje ili nečinjenje koje na bilo koji način narušavaju propisana pravila takmičenja.

Član 19.

Težim disciplinskim prekršajem smatraju se izrazito nesportska ponašanja pojedinaca:

- a) Učešće takmičara, trenera i sudija na takmičenjima u organizaciji KS FBiH, KS BiH ili kantonalnih saveza, a koji nisu članovi KS FBiH;
- b) Nepristojna i vulgarna obraćanja takmičarima, sudijama, trenerima, službenim licima koja podrazumjevaju izricanje kazni prema pravilima takmičenja (HANSOKU i SHIKAKU);
- c) Suđenje na takmičenjima bez saglasnosti KS FBiH;

- d) Fizički nasrtaji i napadi na takmičare, sudije, trenere, službena lica koja podrazumjevaju izricanje kazni prema pravilima takmičenja;
- e) Ometanje takmičara u toku takmičenja dobacivanjem, provociranjem, vrijeđanjem i slično;
- f) Svako drugo činjenje ili nečinjenje koje na bilo koji način teže narušavaju propisana pravila takmičenja.

Težim disciplinskim prekršajem klubova smatraju se:

- a) Učešće klubova na takmičenjima u organizaciji KS FBiH, KSBIH ili kantonalnih saveza, a koji nisu članovi KS FBiH;
- b) Angažovanje službenih lica bez saglasnosti KS FBiH;
- c) Lice koje održi polaganje, a nema licencu ovlaštenog ispitivača;
- d) Vođenje trenaznog procesa bez odgovarajuće diplome izdate od strane nadležne obrazovne institucije;
- e) Vođenje trenaznog procesa lica od strane lica koje nema trenersku licencu;
- f) Suđenje na takmičenju od strane lica koje nema sudijsku licencu;
- g) Lažno dostavljanje podataka ili dokumentacije KS FBiH ili drugoj instituciji i organizaciji;
- h) Neizvršavanje ili neblagovremeno izvršavanje obaveza uplate godišnjih registracija klubova, takmičara, sudija, trenera i ostalih službenih lica;
- i) Nastupi na javnom takmičenju kada je pod suspenzijom ili zabranom nastupa na javnom takmičenju;
- j) Nastup na javnom takmičenju za drugu ekipu bez odobrenja kluba čiji je član;
- k) Nastup na međunarodnom takmičenju bez odobrenja Saveza;
- l) Nastup za inostrani klub bez odobrenja Saveza;
- m) Nagovaranje takmičara da pređe u drugi klub obećavajući mu novac ili druge materijalne pogodnosti ili čineći isto preko trećeg lica;
- n) Neopravdano kašnjenje na pripreme reprezentacije ili napuštanje priprema bez odobrenja;
- o) Nesavjesno, nemarno i neblagovremeno izvršavanje reprezentativnih obaveza;
- p) Izazivanje smetnji drugom karate subjektu da nastupa ili prisustvuje pripremama reprezentacije;
- q) Narušavanje ugleda Saveza u državi ili Saveza i države u inostranstvu;
- r) Neodazivanje pozivu disciplinskog organa, izbjegavanje prijema istog, nedavanje tražene izjave, nedostavljanje dokaza, onemogućavanje utvrđivanja istine i sl.,
- s) Nesavjesno obavljanje funkcije u Savezu,
- t) Ostvarivanje protivpravne imovinske koristi na štetu Saveza i ostalih karate subjekata i
- u) Saradnja i sportsko druženje sa suspendovanim klubovima
- v) Nepoštovanje odluka i normativnih akata Saveza.
- w) Nastupanje klubova ili njihovih takmičara, trenera ili drugih službenih lica na takmičenjima za koja nisu dobili saglasnost KS FBiH;
- x) Neizmirivanje pravosnažnih i konačnih novčanih kazni koje je izrekao disciplinski organ Saveza;
- y) Ispoljavanje nacionalizma, rasizma i vršenje diskriminacije po bilo kojem osnovu;
- z) Svako drugo nepridržavanje Statuta KS FBiH i Pravilnika.

Član 20.

Najtežim disciplinskim prekršajima pojedinaca smatraju se:

- a) Učešće službenih lica (sudije, treneri, takmičari..) na domaćem i međunarodnom takmičenju bez saglasnosti KS FBiH;
- b) Učešće članova KS FBiH (sudije, treneri, takmičari..) na takmičenjima koja nisu pod okriljem WKF-a;
- c) Omogućavanje učešća na takmičenju takmičaru kome nije utvrđena zdravstvena sposobnost;
- d) Omogućavanje učešća na takmičenju takmičaru bez polise osiguranja;
- e) Omogućavanje učešća na takmičenju takmičaru bez akreditacije;
- f) Izazivanje nemira i nereda na takmičenjima;
- g) Grupni fizički obračun sa posljedicom nanošenja lakih i teških tjelesnih povreda;
- h) Uništavanje imovine na takmičenjima u većem obimu;
- i) Razne vrste zloupotreba (falsifikovanje dokumenata, primanje ili davanje mita, pronevjera i utaja novca i dr.) koje imaju obilježje krivičnih djela;
- j) Ispoljavanje nacionalizma i rasizma, uvreda po etničkom, jezičkom, polnom i bilo kom drugom osnovu;

k) Ponavljanje težih prekršaja za koje su izrečene pravosnažne kazne.

Najtežim disciplinskim prekršajima klubova smatraju se:

- a) Učešće klubova na međunarodnim takmičenjima bez saglasnosti KS FBiH;
- b) Učešće klubova članova KS FBiH na takmičenjima koja nisu pod okriljem WKF-a;
- c) Angažovanje lica za obavljanje polaganja za pojaseve, koje nema licencu ovlaštenog ispitivača;
- d) Organizovanje polaganja i izdavanje klupskih diploma bez saglasnosti KS FBiH;
- e) Angažovanje za obavljanje stručnog rada lica bez odgovarajuće diplome izdate od nadležne institucije;
- f) Angažovanje za obavljanje stručnog rada bez trenerske licence;
- g) Angažovanje lica za suđenje bez sudijske licence;
- h) Lažno dostavljanje podataka ili dokumentacije KS FBiH ili drugoj instituciji i organizaciji;
- i) Omogućavanje učešća na takmičenju takmičaru kome nije utvrđena zdravstvena sposobnost;
- j) Omogućavanje učešća na takmičenju takmičaru bez polise osiguranja;
- k) Omogućavanje učešća na takmičenju takmičaru bez akreditacije;
- l) Grubi propusti u organizaciji takmičenja koji imaju za posljedicu prekršaje iz tačke 1.,2.,3.,5. prvog stava ovog člana;
- m) Protivpravno stečena imovinska korist kao posljedica zloupotrebe i krivičnih djela službenih lica u klubu;
- n) Ispoljavanje nacionalizma, rasizma i vršenje diskriminacije;
- o) Neprimjenjivanje Statuta i pravilnika KS FBiH i svako drugo grubo kršenje pravila u sportu.

Član 21.

Nagovaranje takmičara da se takmiči po svom najboljem znanju i mogućnostima, pružanje ili obećanje poklona ili druge materijalne pogodnosti takmičaru ili klubu, da jedan ili više mečeva izvede tako da time koristi drugom klubu ili prihvatanje takve ponude od strane takmičara ili kluba – kažnjava se zabranom nastupa ili vršenja funkcije od 6 mjeseci do 4 godine, a u ponovljenom ili težem slučaju doživotnom diskvalifikacijom.

Klub koji izvrši ovaj prekršaj kažnjava se novčanom kaznom, a u ponovljenom ili težem slučaju zabranom nastupa od 6 mjeseci do 4 godine.

Za pokušaj će se kazniti.

Član 22.

Takmičar koji pokuša da nastupi za klub za koji nije registrovan ili još nije stekao pravo nastupa, ako nema lječarski pregled, ako mu je lječar zabranio takmičenje, ili se nalazi pod suspenzijom ili kaznom, kazniće se zabranom nastupa od 2 do 6 mjeseci, a odgovorni vođa ekipe kazniće se zabranom vršenja funkcije od 2 do 6 mjeseci.

Član 23.

Fizički napad na protivničkog takmičara za vrijeme takmičenja ili prije, odnosno poslije takmičenja, a u vezi sa takmičenjem, kažnjava se zabranom nastupa od 6 mjeseci do 4 godine, a u slučaju nanošenja teže tjelesne povrede, zabranom nastupa od 2 do 4 godine ili doživotnom diskvalifikacijom.

Za pokušaj će se kazniti.

Član 24.

Fizički napad na sudiju, delegata ili drugih službenilica na takmičenju, ili prije, odnosno poslije takmičenja, a u vezi sa takmičenjem, kažnjava se zabranom nastupa od 6 mjeseci do 4 godine, a u slučaju nanošenja teških tjelesnih povreda, doživotnom diskvalifikacijom.

Za pokušaj će se kazniti.

Član 25.

Uzvratanje fizičkog napada kažnjava se blažom kaznom, ako nisu nastupile teže posljedice.

Član 26.

Nesportsko ponašanje, ukoliko je kažnjeno isključenjem sa takmičenja (SHIKAKU), povlači za sobom automatsku suspenziju u vremenskom periodu od 60 dana, novčanu kaznu u iznosu od 500,00 KM i disciplinski postupak.

Pod nesportskim ponašanjem se podrazumjeva psovanje, nepristojni pokreti, prigovaranje odluci ili neizvršavanje odluke sudije, delegata ili drugog službenog lica na takmičenju, izazivanje protivničkog takmičara ili kluba, sudije, delegata ili drugog službenog lica na takmičenju, kao i gledalaca riječima ili pokretima, kao i svako drugo ponašanje koje može štetiti ugledu karate sporta.

Član 27.

Podnošenje netačnih podataka u izvještaju ili prijavi, unošenje netačnih ili lažnih podataka u prijavi za registraciju, ili istovremeno podnošenje prijave za registraciju za dva kluba, jeste prekršaj za koji se takmičar ili rukovodilac kažnjava zabranom nastupa, odnosno vršenja funkcije od 1 do 6 mjeseci, a klub novčanom kaznom.

Član 28.

Rukovodilac ili sudija koji namjerno netačno primjenjuje propise pravilnika kažnjava se zabranom vršenja funkcije od 2 mjeseca do 1 godine.

Član 29.

Počinitelj prekršaja iz člana 24. tačka 1. 3. 4. 5. i 6. kazniće se zabranom nastupa od 6 mjeseci do 4 godine ili doživotnom suspenzijom.

Za disciplinske prekršaje iz člana 23. i 24. ovog Pravilnika pored propisanih kazni može se izreći i novčana kazna kao sporedna kazna uz glavnu kaznu.

Svako ponašanje koje nije izričito predviđeno kao prekršaj u ovom Pravilniku, a predstavlja povredu Statuta i Pravilnika KS FBIH i drugih propisa karate organizacije i tijela, ili prelazi okvire uobičajene i dozvoljene društvene i sportske djelatnosti, kažnjava se jednom od kazni koja je predviđena za sličan prekršaj.

IV - KORIŠTENJE NEDOZVOLJENIH STIMULATIVNIH SREDSTAVA

Član 30.

Kao nedozvoljena sredstva smatraju se medikamenti koji se nalaze na listi zabranjenih stimulativnih sredstava utvrđenoj od strane Antidoping agencije Bosne i Hercegovine.

Član 31.

Sportista koji uzima nedozvoljena stimulativna sredstva ili sportski radnik koji na bilo koji način pomaže sportisti da nabavi ili koristi nedozvoljena stimulativna sredstva kazniće se:

- a) Zabranom nastupa, odnosno vršenja funkcija u trajanju jedne do dvije godine ili zabranom vršenja funkcija;
- b) Ukoliko se prekršaj iz prethodnog stava učini prema sportisti mlađem od 18 godina počinitelj će se kazniti isključenjem iz Saveza.

V - DISCIPLINSKE MJERE (KAZNE)

Član 32.

Disciplinske mjere su:

Za takmičare:

- a) opomena,
- b) novčana kazna,

- c) zabrana nastupa od 1 mjesec do 4 godine,
- d) doživotna diskvalifikacija.

Za funkcionere, vođe ekipa, menadžere, sudije i ostala službena lica:

- a) opomena,
- b) novčana kazna,
- c) zabrana vršenja funkcije na određeno vrijeme,
- d) doživotna diskvalifikacija.

Za klubove:

- a) opomena,
- b) novčana kazna,
- c) zabrana nastupa na određeno vrijeme.

Član 33.

Za lakše disciplinske prekršaje izriče se kazna opomene ili novčana kazna.

Član 34.

Za teže disciplinske prekršaje izriču se disciplinske kazne:

- a) zabrana nastupa i vršenje funkcije na određeno vrijeme,
- b) zabrana nastupa na određenom broju takmičenja,
- c) posljednja opomena pred isključenje i
- d) novčana kazna.

Član 35.

Za najteže disciplinske prekršaje izriču se disciplinske kazne:

- a) zabrana nastupa i vršenje funkcije na određeno vrijeme i
- b) doživotna diskvalifikacija.

Član 36.

Kazna zabrane nastupa i kazna zabrane vršenja funkcije ne može biti duža od 4 godine.

Kazna zabrane vršenja funkcije povlači i zabranu nastupa, i obratno.

Član 37.

Visinu novčanih kazni posebnom odlukom utvrđuje Upravni odbor KSBIH.

U zavisnosti od težine prekršaja i okolnosti pod kojim je prekršaj učinjen novčana kazna se izriče u odnosu na prosječni lični dohodak Bosne i Hercegovine.

Disciplinska komisija za kazne "SHIKAKU" dosuđene na takmičenjima, takmičarima, trenerima ili cijelim ekipama, po dobijanju izvještaja, po principu automatizma, izriče novčane kazne klubu čiji su karate subjekti članovi:

- a) za "SHIKAKU" dosuđen samo takmičaru ili treneru 500,00 KM,
- b) za "SHIKAKU" dosuđen cijeloj ekipi 1.000,00 KM.

Utvrđena visina kazne mora se uplatiti u roku od 7 dana od dana pravosnažnosti odluke na tekući račun KS FBIH, pod prijetnjom prinudne naplate preko Suda.

Učinitelj prekršaja koji je kažnjen novčanom kaznom ne može nastupati i vršiti funkcije do ispunjenja obaveze.

Član 38.

Za sve prekršaje koje izvrše rukovodioci i takmičari, kao predstavnici klubova, odgovornost snose i sami klubovi koji također podliježu disciplinskom postupku i disciplinskim mjerama.

Član 39.

Pravosnažne odluke o kazni koje mogu imati uticaja na regularnost takmičenja dostavljaju se svim zainteresovanim klubovima ili nadležnim savezima.

VI - DISCIPLINSKI POSTUPAK

Član 40.

Disciplinski postupak pokreće se na osnovu disciplinske prijave koju može da podnese svaki pojedinac ili organizacija koji su članovi KS FBIH.

Disciplinski postupak se može pokrenuti i po službenoj dužnosti kada Disciplinska komisija na bilo koji način sazna da je učinjen disciplinski prekršaj.

Član 41.

Disciplinski postupak može se pokrenuti:

- a) Na osnovu izvještaja delegata, sudije ili drugih rukovodilaca na takmičenju,
- b) Na osnovu prijave karate rukovodstva ili rukovodioca,
- c) Na osnovu prijave kluba ili člana kluba,
- d) Na osnovu zajedničke prijave najmanje 5 službenih lica na takmičenju i
- e) Po službenoj dužnosti.

Član 42.

Prijava se podnosi Disciplinskoj komisiji koja odlučuje o pokretanju postupka.

Član 43.

Postupak se mora uvijek pokrenuti kada je izvršen jedan od prekršaja koji je previđen u ovom Pravilniku ili kada je takmičar isključen sa takmičenja, a to isključenje povlači automatsku suspenziju.

Član 44.

Delegat takmičenja može donijeti odluku o suspenziji pojedinaca ili klubova na osnovu učinjenih disciplinskih prekršaja. Ukoliko delegat takmičenja ne izrekne kaznu na licu mjesta podnosilac prijave ima pravo žalbe prvostepenom tijelu.

Član 45.

U disciplinskom postupku saslušavaju se izvršilac prekršaja i svjedoci, a prikupljaju se i drugi dokazi.

Ako se disciplinski postupak vodi protiv kluba, mora se saslušati predsjednik ili drugi ovlašteni predstavnici kluba.

Član 46.

Izvršilac prekršaja ima pravo da traži da se o svom trošku pozove na sjednicu Disciplinskog tijela kada se odlučuje o njegovom prekršaju.

Član 47.

Kada Disciplinska komisija utvrdi da nema mjesta pokretanju ili daljem vođenju disciplinskog postupka, donosi odluku o obustavi postupka i o tome pismeno obavještava podnosioca izvještaja i prijave.

Protiv odluke o obustavi postupka podnosilac izvještaja ili prijave ima pravo žalbe drugostepenom disciplinskom tijelu po odredbama ovog Pravilnika

Član 48.

O svakoj radnji preduzetoj u toku disciplinskog postupka sastaviće se uredan zapisnik istovremeno kad se radnja vrši.

U zapisnik se unosi naziv prvostepenog organa, mjesto gdje se vrši radnja, dan i čas kada je radnja započeta, lična imena prisutnih lica i u kom svojstvu prisustvuju, kao i naznačenje prekršajnog predmeta po kom se radnja preduzima.

Zapisnik treba da sadrži bitne podatke o toku i sadržini preduzete radnje.

U zapisnik se u obliku pripovjedanja ubilježava samo bitna sadržina datih iskaza.

Zapisnik potpisuje ispitano, odnosno saslušano lice, lica koja obavezno prisustvuju radnjama u disciplinskom postupku kao i prijavljeni, branilac i oštećeni ako su prisutni imaju pravo da pročitaju zapisnik ili da zahtjevaju da im se pročita.

Ako je bilo prigovora na zapisnik obavezno navesti primjedbe.

Član 49.

Troškovi disciplinskog postupka, ako ih ima, snosi izvršilac prekršaja protiv koga se izrekne kazna.

Disciplinska komisija u svojoj odluci mora riješiti ko je dužan da plati troškove postupka.

VII - SUSPENZIJA

Član 50.

Suspenzija može biti:

- a) automatska,
- b) na osnovu odluke disciplinskog tijela.

Član 51.

Automatska suspenzija nastupa kada je takmičar, član ekipe ili ekipa isključena (SHIKAKU) na takmičenju.

Automatska suspenzija može trajati prema odredbama člana 12. ovog Pravilnika.

Za najteže disciplinske prekršaje automatsku suspenziju Disciplinska komisija može produžiti za još 60 dana.

Disciplinska komisija može donijeti odluku o ukidanju automatske suspenzije ukoliko utvrdi da nema mjesta s obzirom na prirodu izvršenog prekršaja.

Automatska suspenzija se uračunava u kaznu.

Član 52.

Suspenzija na osnovu odluke disciplinskog tijela može se izreći:

- a) u slučaju kada je izvršen teži prekršaj, a suspenzija traje do donošenja odluke;
- b) u slučaju nedolaska na saslušanje, suspenzija prestaje kada pozvani dođe na saslušanje;
- c) u slučaju ako se takmičar, rukovodilac ili sudija nalazi u pritvoru ili na izdržavanju kazne po rješenju sudije za prekršaje ili presudi krivičnog suda, suspenzija traje do ukidanja pritvora, odnosno do prestanka izdržavanja kazne.

Vrijeme provedeno pod suspenzijom uračunava se u kaznu, osim ako je u pitanju suspenzija zbog nedolaska na saslušanje.

Član 53.

Ako izvršilac prekršaja koji je suspendovan ili poslije drugog poziva ne dođe na saslušanje, a od drugog poziva je prošlo 8 dana, izreći će se kazna na osnovu materijala kojim raspolaže Disciplinska komisija.

Član 54.

Ako klub ili pojedinac u ostavljenom roku ne uplati novčanu kaznu ili ne ispuni neku obavezu prema KS FBiH, biće suspendovan na osnovu odluke Disciplinske komisije.

Suspenzija počinje da se računa od dana isteka najavljenog roka za isplatu novčane kazne ili ispunjenja obaveze, a automatski prestaje u času uplate punog iznosa novčane kazne ili ispunjenja druge obaveze.

Član 55.

U odluci Disciplinske komisije mora se navesti: opis prekršaja, zatim vrsta prekršaja, kazna, dan od kada kazna stupa na snagu, obrazloženje i uputstvo o pravnoj pouci.

Član 56.

Disciplinska komisija dužna je odluku o kazni pismeno dostaviti izvršiocu prekršaja u roku od 3 dana, a u složenim slučajevima u roku od 8 dana od dana izricanja.

Kazna može početi prije dostavljanja odluke, ukoliko ne postoji suspenzija koja se uračunava u kaznu.

Član 57.

Protiv odluke o kazni može se podnijeti žalba u roku od 8 dana od dana uručenja odluke.

Uz žalbu se prilaže potvrda o uplati takse od strane žalioaca, u visini koju utvrdi prvostepeno tijelo, s tim da taksa ne može biti veća od minimalno predviđene novčane kazne.

Ako se žalba uvaži, uplaćena taksa se vraća žalioocu.

Žalba se podnosi prvostepenom disciplinskom tijelu, koje cijeli predmet u roku od 3 dana dostavlja višem disciplinskom tijelu, pošto predhodno utvrdi da li je žalba blagovremena i propisano taksirana.

Žalba koja nije podnijeta u propisanom roku ili koja uopšte nije taksirana ili nedovoljno taksirana, prvostepeno disciplinsko tijelo odbiće je kao neblagovremeno podnijetu.

Žalba nije dozvoljena protiv odluke o suspenziji.

Član 58.

Žalbu mogu podnijeti:

- a) kažnjeni,
- b) podnosilac izvještaja ili prijave,
- c) klub čiji je takmičar kažnjen,
- d) rukovodstvo čiji je član kažnjen.

Podnosilac prijave ili izvještaja ne plaća taksu na žalbu.

Član 59.

Žalba na odluku o kazni za najteže disciplinske prekršaje ne odlaže izvršenje kazne.

Član 60.

Drugostepeno disciplinsko tijelo može rješavajući o žalbi, odlučiti da se odluka:

- a) ukine i predmet vrati prvostepenom disciplinskom tijelu na ponovni postupak,
- b) potvrdi, i
- c) preinači, a izrečena kazna poveća ili smanji odnosno izvršilac prekršaja oslobodi od disciplinske odgovornosti.

Kazna se ne može povećati ako je samo kažnjeni podnio žalbu.

Drugostepeno disciplinsko tijelo mora svoju odluku donijeti u roku od 30 dana.

Ako drugostepeno disciplinsko tijelo ne donese svoju odluku u roku iz predhodnog stava smatra se da žalba nije usvojena.

VIII - MATERIJALNA ODGOVORNOST

Član 61.

Karate subjekti su odgovorni za materijalnu štetu koju naprave svojim disciplinskim prekršajem i dužni su da tu štetu nadoknade.

Ako štetu prouzrokuje više karate subjekata, svaki od njih je odgovoran za dio štete koju je prouzrokovao.

Ako ne može da se utvrdi pojedinačna odgovornost i udio u šteti, štetu nadoknađuju karate subjekti u jednakim djelovima.

Član 62.

O materijalnoj šteti odlučuje Disciplinska komisija.

U postupku se utvrđuje:

- a) postojanje štete,
- b) okolnosti pod kojima je nastala,
- c) visina štete,
- d) ime i prezime, odnosno naziv karate subjekta koji je počinio štetu,
- e) visina paušalnog iznosa štete, ako se nemože utvrditi njen tačan iznos,
- f) visini štete utvrđuje se na osnovu tržišne vrijednosti nove stvari.

Član 63.

Sve odredbe ovog Pravilnika koje se odnose na utvrđivanje disciplinske odgovornosti i izricanje kazne se primjenjuju i kod materijalne odgovornosti.

IX - OBNOVA DISCIPLINSKOG POSTUPKA

Član 64.

Disciplinski postupak se može obnoviti:

- a) ako se utvrdi da je pravosnažna odluka zasnovana na lažnim dokazima,
- b) ako se sazna za nove činjenice ili nove dokaze, na osnovu kojih bi se mogla donijeti povoljnija odluka da su te činjenice ili dokazi bili upotrebljeni u ranijem postupku.

Član 65.

Prijedlog za obnovu postupka mogu podnijeti sva lica i tijela iz člana 56. ovog Pravilnika, osim podnosioca izvještaja ili prijave, u roku od godinu dana od uručenja pravosnažne odluke.

U istom roku i disciplinsko tijelo koje je izreklo kaznu u prvom stepenu može obnoviti postupak po službenoj dužnosti ako postoje uslovi iz člana 59. ovog Pravilnika.

Prijedlog za obnovu postupka ne odlaže izvršenje kazne.

Član 66.

Prijedlog za obnovu postupka podnosi se disciplinskom tijelu koje je izreklo kaznu u prvom stepenu.

Ako Disciplinska komisija utvrdi da je prijedlog za obnovu postupka osnovan, sprovede se novi postupak i donijeti nova odluka, koja za kažnjenog ne može biti nepovoljnija od ranije odluke.

Protiv odluke po prijedlogu za obnovu postupka podnosilac prijedloga ima pravo žalbe višem disciplinskom tijelu u roku od 8 dana od dana prijema odluke.

Uz žalbu se prilaže potvrda o uplati takse koju utvrdi nadležno tijelo s tim da taksa ne može biti veća od minimalno predviđene novčane kazne.

X - VANREDNO UBLAŽAVANJE KAZNE

Član 67.

Kada je očigledno da je izrečena kazna imala poučno dejstvo na kažnjenog, a pošto je izdržana najmanje polovica kazne, može se podnijeti molba za vanredno ublažavanje kazne.

Molba se podnosi disciplinskom tijelu koje je izreklo kaznu u prvom stepenu, a koje cio predmet sa svojim prijedlogom dostavlja na rješavanje drugosstepenom disciplinskom tijelu.

Drugostepeno disciplinsko tijelo ako utvrdi da je molba osnovana, može donijeti odluku o ublažavanju ili oslobađanju od daljeg izdržavanja kazne.

Protiv odluke o molbi za vanredno ublažavanje kazne, žalba se ne može podnijeti.

Molbu za vanredno ublažavanje kazne može podnijeti kažnjenik ili klub, odnosno rukovodstvo čiji je on član.

Molba za vanredno ublažavanje kazne može se podnijeti samo jedanput.

Član 68.

Molba za varedno ublažavanje kazne doživotne diskvalifikacije može se podnijeti kada protekne najmanje 2 godine od pravosnažnosti odluke o kazni.

O takvoj molbi odlučuje Skupština KS FBIH.

Molba se podnosi Disciplinskoj komisiji, koja je sa svojim prijedlogom upućuje Upravnom odboru i Skupštini KS FBIH.

Molba se može ponoviti nakon 2 godine od dana odbijanja ranije molbe.

XI - ZASTARJELOST U DISCIPLINSKOM POSTUPKU

Član 69.

Zastarjelost disciplinskih kazni po ovom Pravilniku nastupa kada:

- a) Protekne dvostruko vrijeme predviđeno kao vrijeme kazne po odredbama ovog Pravilnika;
- b) Protekne godinu dana od dana pravosnažnosti odluke kojom izrečena novčana kazna kao glavna ili kada je novčana kazna izrečena kao sporedna kazna.

Zastarjelost izvršenja kazne počinje teći od dana pravosnažnosti odluke kojom je izrečena kazna, a prekida se svakom radnjom koja se preuzima od strane nadležnih organa u toku trajanja roka zastarjelosti.

Apsolutna zastarjelost nastupa kada protekne trostruko vrijeme kazne kao vremenske kazne, odnosno 2 godine od dana pravosnažnosti odluke kojom je izrečena novčana kazna kao glavna ili kada je novčana kazna izrečena kao sporedna kazna.

XII - TROŠKOVI POSTUPKA

Član 70.

Troškovi postupka padaju na teret karate subjekta oglašenog krivim ili u slučaju oslobađajuće odluke na teret Saveza.

XIII - EVIDENCIJA IZREČENIH MJERA

Član 71.

Evidenciju izrečenih mjera od strane Disciplinskih organa vodi kancelarija Saveza u posebnoj knjizi za evidenciju izrečenih disciplinskih mjera.

Evidencija sadrži:

- a) redni broj,
- b) naziv karate subjekta kome je izrečena disciplinska mjera,
- c) vrsta izrečene disciplinske mjere,
- d) datum kada je odluka donijeta i postala konačna,
- e) naziv disciplinskog organa koji je izrekao disciplinsku mjeru,
- f) datum i broj odluke drugostepenog organa,
- g) datum konačnosti drugostepene odluke i
- h) primjedbe.

Član 72.

Disciplinska komisija odnosno Upravni odbor imaju dužnost da uz obavještenje o izrečenoj disciplinskoj mjeri kancelariji Saveza dostave i primjerak odluke.

XIV - ZAVRŠNE ODREDBE

Član 73.

Disciplinski pravilnici nižih nivoa udruživanja (kantonalnih, regionalnih, gradskih, opštinskih i drugih saveza, klubova i organizacija udruženih u Savez ne mogu biti u suprotnosti sa ovim pravilnikom.

Član 74.

Izmjene i dopune Pravilnika vrši Upravni odbor Saveza.

Član 75.

Tumačenje Pravilnika u prvom stepenu daje Disciplinska komisija, a u drugom Upravni odbor Saveza.

Član 76.

Stupanjem na snagu ovog pravilnika prestaju važiti odredbe prethodnog pravilnika.

Ovaj pravilnik stupa na snagu danom njegovog usvajanja od strane Upravnog odbora Saveza.

Broj: 05-UO-P9/18
Sarajevo, 13.07.2018. godine

PREDSJEDNIK
UPRAVNOG ODBORA KS FBiH

Mirsad Fežić